

LA STRAGE DEGLI INNOCENTI 2

O Signor, credevi vessom tocà 'l fond
Tra mazzament, guer e persecuzion.
Ecco, invece, rivà 'n 'altra noità
De tanti por fiolet c'han mazzà
Propi intanta ch'eran a scola:
'Na tragedia de lassam senza parola!
E pur di alter part, no domà là
'Sti assassin dagn e mort han somenà.

O Signor, domà Ti te podet tegn arent
E consolà tanti por innocent
E tanto piang de mam e papà
Coi to caress riussì a sugà.

Te pregom,anca num,vegh pietà
Che l'è inscì cativa 'sta nostra umanità!
Tochigh el coeur a 'sti malament
Che se la ciapen con di por innocent
Che bestemen el To Santo Nom
Credendo de dat gloria a mazzà tanti person
"Pas in Terra" canten i angiol a Natal
Num ghe credom: 'sto miracol domà Ti te podet fal!

da Don Arnaldo